



Hermannus ex nobili familia de Fridingē natus fuit. Is ab ineunte ætate literis operam dedit, & magnam sibi eruditionem acquisiuit. Erat etiam omnis generis uirtutibus ornatus, & singulari māsuetudine præditus. Itaq; cum Bertholdus Episcopus Constantiensis mortuus esset, hic Hermannus omnium cōsensu surrogatus fuit. Eam ecclesiam nactus ante omnia cū finitimis & eius loci ciuibus pacē iniit, ac ut res ordine in Ecclesia peragerentur diligēter prospexit. Hinc factum ut Friderico I. Imperatori gratissimus extiterit. Cum ergo eo tempore ob pontificum insolētiam magnæ turbæ in Germania excitarentur, Fridericus Co-

mitia Imperij ob huius Episcopi auctoritatem Constantiæ celebrauit, Anno millesimo centesimo octuagesimo tertio. Vbi etiam post principum deliberationes magno omnium desiderio pax publica per totum Imperium constituta fuit. Cum hoc modo Hermānus magna dexteritate suam Ecclesiam per annos 12. administrasset, anno 1191. obiit, atq; in sua Ecclesia sepultus quiescit. Anon. in Episc. Constant.